

Astra Arminensi, & in nonnullis pro nobis & eadem ecclesia in temporalibus ecclesiasticis, omni modo, uia, iure et forma, quibus melius fieri possit, tenore presentium de plenitudine apostolica potestatis procuratorem nostrum facimus specialem, dantes & cedentes tibi ut procuratori nostro, de plenitudine dictae apostolicae potestatis omnimodam, plenam & liberam facultatem nostram et dictae ecclesiae nomine tractandi, procurandi, foraliter concludendi, & effectualiter inducendi iocundam & integram unionem ecclesiae sanctae dei, per omnem & quamlibet rationabilem uiam coniunctim et diuisim, quae tibi procuratori nostro uidebitur accommodata, ac quolibet opportuna. Et specialiter renunciandi et cedendi omni iuri papatus ac titulo et possessioni, quod, quem, & quam habemus in eodem, si ubi & ante uidebitur tibi pro unione huiusmodi expedire: nec non omnia & singula faciendi, quae circa praemissa & quodlibet eorum erunt, aut tibi procuratori nostro uidebuntur quomodolibet opportuna, etiam si foret maiora expressatis, & mandatum exigent quantumcumque speciale, & quae nos ipsi facere possemus, si personaliter interessemus, promittentes deo & ecclesiae sanctae dei, ratum, gratum, & firmum perpetuo irreuocabiliter habituros, quicquid per te procuratorem nostrum actum, gestum, seu factum fuerit in praemissis, idque facturos, dante domino, inuiolabiliter obseruari, promittentes bona fide & sub attestato dei iudicis, quod potestatem huiusmodi tibi sic (ut praemittitur) attributam & concessam reuocare non intendimus, nec reuocabimus te uerbo publice uel occulte, & suppletes omnem defectum si quis in praesenti mandato fuerit admissus, uel in eo aliquid est omisissum. Datum Armini, VI. idus Martii, pontificatus nostri anno IX.

B Quae scheda lecta, dominus Carolus leuans se, dixit haec uerba: Cum sanctissimus dominus noster Gregorius papa duodecimus me suum procuratorem constituerit ad cedendum modo & forma, prout in suis literis nunc lectis dinoscitur contineri: Ego Carolus supra dictus sciens intentionem domini nostri sanctissimi Gregorii papae xii. fuisse & esse totalem ad reintegrationem Christianorum, si possit largiente domino fieri, & in hoc omnem quantum in eo est, operam praestare per futuram papatus cessionem per se & suos, & quod ab omnibus caueatur, quae hoc sanctum propositum impedire possent aut distorferre, per hoc sacrum concilium declarari & determinari peto humiliter et instanter, utrum pro unione ecclesiae dei & totali reintegratione per dei gratiam procuranda, sacro concilio utile & expediens uideatur, quod nomine praefati domini nostri papae fiat hic Constantiae cessio, antequam Niciam accedatur, seu an Petrus de Luna, qui in sua obedientia dicitur Benedictus xii. cedere uelit, uel nolit, experiatur. Quibus dictis, praefatus dominus archiepiscopus Mediolanensis in ambone existens, deputatus per synodum, respondit in modum qui sequitur:

¶ Concilium determinat, quod utile & expediens est, quod fiat hic in Constantia renunciatio.

Sacrosancta generalis synodus Constantiensis determinat & declarat, expediens & utile fore pro unione ecclesiae sanctae dei & totali reintegratione per dei gratiam procuranda, quod nomine illius domini qui in sua obedientia dicitur Gregorius xii. fiat hic in Constantia cessio, antequam Niciam accedatur, seu an Petrus de Luna qui in sua obedientia dicitur Benedictus xii. cedere uelit, uel nolit, experiatur. Subsequenter dictus dominus archiepiscopus Mediolanensis legit capitula quae sequuntur.

¶ Quod uacante sede, non procedatur ad electionem Romani pontificis.

Sacrosancta generalis Constantiensis synodus ad facilius, liberius & utilius integram unionem ecclesiae consequendam, pronunciat, statuit, & ordinat, quod praetextu cuiuscunque cessionis aut vacationis sedis apostolicae siue papatus, durante praesenti concilio factae uel faciendae, ad electionem futuri Romani pontificis nullatenus procedatur sine deliberatione & consensu huius sacri generalis concilii. Et si quid fieret, sit ipso facto autoritate huius sacri concilii irritum & inane. Nullusque
ela